

## Aruba a celebra en grande cu Xander Bogaerts

**SAN NICOLAS** - Diasabra anochi, Aruba a uni cu Xander den un celebracion bunita na unda cu nos pueblo a demostra nos orguyo nacional e admiracion y gradimento pa loke el a haci pa nos isla internacionalmente. Xander Bogaerts cu su esfuerzonan y e amor cu e tin pa su isla, a pone nomber di Aruba un biaha mas briya mundialmente cu su logro cu su di 2 titulo di Champion Mundial.

Gobierno di Aruba a honra Xander Bogaerts como embahador di bon boluntad pa nos pais. Hunto cu pueblo di Aruba a celebra esaki na grandi diasabra anochi den Carnival Village na San Nicolas. Ministerman di Gabinete Wever-Croes a luba palabranan di elogio na nos gran orguyo nacional gradiciendo e den nomber di nos pueblo.

Diferente grupo di baseball a bin uniforma pa saluda Xander kende tambe a tumu su tempo pa saluda nan. Hopi mucha tambe a yega pa saluda nan heroe di baseball. Un demostracion di humildad cu e hoben beisbolista tin kende tambe como mucha, manera tur e muchanan cu a bin salude, tawata tin e sono di yega asina leu den e deporte.

Segun un comunicado di gobierno, prome minister Evelyn Wever-Croes (MEP), pa motibo di kebrante di salud, no por tawata presente hunto cu Xander den e celebracion aki, pero el a expresa su satisfaccion y alegria pa wak asina tanto hende acudi na e evento pa asina duna honor na Xander Bogaerts, e comunicado ta bisa.

"Xander Bogaerts ta un hoben cu ta inspira nos hoben y adultonan. Un hoben cu apesar di su logronan grandi, a sa di keda humilde di curason. Nos pueblo a uni cu Xander den un celebracion grandi. Danki Xander, pa pone Aruba den bista di mundo un biaha mas. Bo esfuerzo ta un logro pa Aruba tambe", prome minister a expresa.

Potretnan ta cortesía di gobierno di Aruba.



CAMPAÑA DI FIN DI AÑA  
**LIKE**  
NOS FACEBOOK PAGE

Y SHARE NOS POST DI CAMPAÑA  
Y HAYA CHENS DI GANA

**UN 2-FOR-1 VOUCHER OF GANA  
UN BASKET DI FIN DI AÑA!**

CAMPAÑA TA VALIDO FOR DI 15 DI OKT. TE CU 14 DI DEC.  
TUR SIMAN LO BAI SACA UN GANADO! SIGUI NOS Ariba FACEBOOK PA MAS INFORMACION

SERLIMAR

LIKE & SHARE

